

ARTICLE 371G LEH FCAA, 2023 ADOPTION CHUNGCHANG

VL Hrima

28.10.2025

Article 371G lo pian dan thuhma:

British aṭanga India a in dan khan British hunlaia inrelbawl dan dung zuiin Mizo District (Lushai Hills District) chu Assam State-a district pakhat angin beh zui tir a ni. India Danpuiah hian tribal-te ram humhalh bikna dan chi hnih- 5th Schedule leh 6th Schedule a awm a, India Danpui hman ṭan a nih rual khan Mizo District pumpui chu 6th Schedule Area-ah puan a ni.

North-Eastern Areas (Reorganisation) Act, 1971 zul zuiin January ni 21, 1972 khan Assam sawrkar enkawl na hnuai aṭanga la chhuakin Central sawrkarin direct-a a enkawl zui turin Mizoram chu Union Territory-ah puan a ni. April ni 29 khan Mizoram chungga Pawi-Lakher Regional Council chu hmun thum- Pawi, Mara leh Chakma-ah te ṭhen darhin heng chauh hi 6th Schedule Area-ah puan zui a ni.

June ni 30, 1986 khan MNF leh India sawrkar chuan inremna thuthlung (Mizoram Peace Accord) an ziah zulzuiin February ni 20, 1987 khan Mizoram chu amaha ro inrel hran ve thei turin Statehood pek a ni.

[Note: Mizoram Peace Accord hi pawl pahnih inkara inremna (bilateral agreement) anga sawi ṭhin a nih avangin Mizo mipui te chu he inremna-ah hian tel ve lo anga sawi an awm ṭhin. Amaherawhchu, he inremnaah hian Mizoram mipui zawng zawng pawh an tel vek a, Mizoram chu mahni puala thuneihna hranpa (sovereign power) nei ve lo a la nih avanga pawl hranpa anga chhiar tel ve an ni lo chauh zawk a ni. He inremna thuthlunga hming ziaktu (signatory) zingah pawh Pu Laldenga (President, MNF) leh Pu R.D. Pradhan (Home Secretary, Govt. of India) bakah Pu Lalkhama (Chief Secretary, Govt. of Mizoram) a tel tih hriat tel a ṭha awm e. Mizoram Accord hi Mizoramin Statehood a neih hnu a siam chu ni se pawl pathum inkara inremna thuthlung (tripartite agreement) angin sawi a ni ang,]

Mizote chu tribal an nih avangin an ram, hnam leh sakhua humhalh bikna pek theih an ni a, chumi ang chuan Mizoram Peace Accord zulzuiin India Danpuiah Mizoram tan bika hman tur- Article 371G chu ziah luh tel nghal a ni . India Danpuia Mizote leh an ram humhalhna leh inenkawl na bik atana a in ziah dan chu hetiang hi a ni:

371G. Special provision with respect to the State of Mizoram

Notwithstanding anything in this Constitution. —

(a) no Act of Parliament in respect of—

(i) religious or social practices of the Mizos,

(ii) Mizo customary law and procedure,

(iii) administration of civil and criminal justice involving decisions according to Mizo customary law,

(iv) ownership and transfer of land,

shall apply to the State of Mizoram unless the Legislative Assembly of the State of Mizoram by a resolution so decides:

Provided that nothing in this clause shall apply to any Central Act in force in the Union Territory of Mizoram immediately before the commencement of the Constitution (Fifty-third Amendment) Act, 1986.

(b) the Legislative Assembly of the State of Mizoram shall consist of not less than forty members.

Article 371G thu ken tlangpui:

Article 371G title, “Special provision with respect to the State of Mizoram,” tih hian he 371G hi Mizoram atan bik liau liaua siam a ni tih a tar lang.

A thu ken bul ðanna, “Notwithstanding anything in this Constitution,” tih hi dan hre mite chuan Non Obstante Clause tiin an sawi ðhin. Chumi awmzia chu he article thu ken Mizoram leh a inrelbawl na chungchangah chuan a lal ber tihna a ni. India Danpui khawilaiah pawh he Article 371G kalh hian eng pawh lo inziakin, engtiang pawhin lo inziak se, Mizoram leh a inrelbawl na chungchangah chuan Article 371G thu hi dah lal ber tur tihna a ni.

Eg. Article 254 (Doctrine of Repugnancy)-a Central Act leh State Act-ah thu inkalh a awm chuan Central Act a lal zawk tura tihna ang chi kha Article 371G chungchangah chuan hman tum ve chi a ni lo.

Mizoram Assembly-in resolution hmanga a pawmpui hmasa a nih ngawt loh chuan, Clause (a), sub-clause (i), (ii), (iii) & (iv)-a a thil tar lan- Mizo te hnam, sakhua, leh ram lam khawih

buai tur zawngin Mizoram chhungah eng Central Act mah hman phal a ni lo. Clause (a)-ah hian proviso pakhat a rawn dah telin Article 371G hman tan a nih hmaa Central Act lo hman tawhte chu a huam loh thu a sawi.

eg. FCA, 1980 chu Article 371G hman tan hmaa lo hman tan tawh a nih avangin Article 371G hmanga sawi buai theih a ni loh laiin FCAA, 2023 chu 1986 hnu lama siam a nih avangin Mizo hnam, sakhua leh ram khawih buai thei thilah chuan Article 371G hmang hian dan theih a ni. Amaherawhchu, FCAA, 2023 hi Mizoram Assembly-in Resolution hmanga a adopt avangin FCAA, 2023 chung a Article 371G thuneihna (Central Act chung a Mizote thuneihna) chu a bo ta tihna a ni thung.

Clause (b) chuan Mizorama MLA awm thei zat chu 40 aia tlem lo a nih thu a sawi. Article 371G hi non-obstante clause a nih angin Article 170-a lama India ram state zawng zawng tana MLA 60 aia tlem lo nei tura a tihna chu Mizoram tan a thai chhe nghal.

Mizoramin Assembly-in Resolution hmanga FCAA, 2023 hian eng nge a tulna?

Ninth Mizoramin Assembly Session (August ni 27, 2025)-a FCAA, 2023 adopt tura resolution an sawi ho tum, adopt a nih hma khan House Leader chuan Project 7 atan FCAA, 2023 hmang hian Forest Clearance exemption an hmuh fel tawh thu a sawi. Hei hian Mizorama developmental works kalpui a awlsamna atana Mizoram Assembly-in House Resolution hmanga FCAA, 2023 a adopt kher anga sawi hi thu belhchian dawl lem lo a ni lo tih a tichiang awm e. Chutihruai chuan Mizoram Assembly-in Resolution hmanga FCAA, 2023 hi a adopt avang hian FCAA, 2023 hi Mizo hnam, sakhua leh ram inrelbawl na tibuai zawnga hman a nih pawhin 371G hmanga sawi buai theih a ni tawh lo tih chu Article 371 clause (a) chuan a sawi Chiang hle thung.